

BOSNA I HERCEGOVINA
Konkurencijsko vijeće



БОСНА И ХЕРЦЕГОВИНА
Конкуренцијски савјет

Zaključak
po Prijavi namjere koncentracije privrednog subjekta Akcionarsko društvo za promet
nafte, naftnih derivata i prirodnog gasa "Nestro Petrol" Banja Luka

Sarajevo
juni, 2011. godine



Broj: 06-26-1-009-5-II/11
Sarajevo, 8. juni 2011. godine

Na osnovu člana 25. stav (1) tačka e), člana 42. stav (2), a u vezi s čl. 12., 14. i 16. Zakona o konkurenciji («Službeni glasnik BiH», br. 48/05, 76/07 i 80/09), a rješavajući po Prijavi namjere koncentracije privrednog subjekta Akcionarsko društvo za promet nafte, naftnih derivata i prirodnog gasa "Nestro Petrol" Banja Luka, Kralja Alfonsa XIII broj 9, 78000 Banja Luka, zaprimljenoj pod brojem: 06-26-1-09-II/11 dana 26. maja 2011. godine, Konkurencijsko vijeće, na 15. (petnaestoj) sjednici održanoj dana 8. juna 2011. godine, je donijelo

Z A K L J U Č A K

1. Odbacuje se Prijava namjere koncentracije privrednog subjekta Akcionarsko društvo za promet nafte, naftnih derivata i prirodnog gasa "Nestro Petrol" Banja Luka, Kralja Alfonsa XIII broj 9, 78000 Banja Luka kojom namjerava kupiti jednu benzinsku stanicu od privrednog subjekta "Parma Trend" Proizvodno trgovačko preduzeće d.o.o. Laktaši, Trn. Cara Dušana 110, 78250 Laktaši, radi nepostojanja obaveze prijave, u smislu člana 14. stav (1) tačka b) Zakona o konkurenciji.
2. Ovaj Zaključak bit će objavljen u «Službenom glasniku BiH», službenim glasilima entiteta i Brčko Distrikta Bosne i Hercegovine.

O b r a z l o ž e n j e

Konkurencijsko vijeće Bosne i Hercegovine (u daljem tekstu: Konkurencijsko vijeće) je zaprimilo, pod brojem: 06-26-1-09-II/11 dana 26. maja 2011. godine, Prijavu namjere koncentracije (u daljem tekstu: Prijava) privrednog subjekta Akcionarsko društvo za promet nafte, naftnih derivata i prirodnog gasa "Nestro Petrol" Banja Luka, Kralja Alfonsa XIII broj 9, 78000 Banja Luka (u daljem tekstu: Nestro Petrol ili Podnosilac prijave) kojom namjerava kupiti jednu benzinsku stanicu od privrednog subjekta "Parma Trend" Proizvodno trgovačko preduzeće d.o.o. Laktaši, Trn, Cara Dušana 110, 78250 Laktaši (u daljem tekstu: Parma Trend), koja se nalazi u Laktašima, Mladena Stojanovića bb.

Konkurencijsko vijeće uvidom u podnesenu Prijavu je utvrdilo da nije potpuna i kompletna, u smislu člana 30. stav (1) Zakona o konkurenciji (u daljem tekstu: Zakon) i čl. 9. i 11. Odluke o načinu podnošenja prijave i kriterija za ocjenu koncentracija privrednih subjekta («Službeni glasnik BiH», broj 34/10), te je zatražilo dopunu iste, aktom broj: 06-26-1-09-1-II/11 dana 27. maja 2011. godine.

Podnosilac prijave je dostavio traženu dokumentaciju, podneskom broj: 06-26-1-009-2-II/11 dana 1. juna 2011. godine.

Konkurencijsko vijeće je nakon dostavljene dokumentacije izdalo Potvrdu o prijemu kompletne i uredne Prijave, u smislu člana 30. stav (3) Zakona, broj: 06-26-1-009-3-II/11 dana 8. juna 2011. godine.

Podnosilac prijave, u smislu člana 30. stav (2) Zakona, je naveo da zahtjev za ocjenu koncentracije nema namjeru dostaviti nekom drugom tijelu za konkurenciju izvan Bosne i Hercegovine.

Konkurencijsko vijeće iz Prijave je utvrdilo slijedeće činjenice:

Prijava je podnesena, u smislu člana 16. stav (2) Zakona, jer su učesnici koncentracije zaključivanjem Pisma namjere izrazili obostranu spremnost o provođenju predmetne koncentracije.

1. Učesnici koncentracije

Učesnici koncentracije su privredni subjekt Akcionarsko društvo za promet nafte, naftnih derivata i prirodnog gasa "Nestro Petrol" Banja Luka, Kralja Alfonsa XIII broj 9, 78000 Banja Luka i privredni subjekt "Parma Trend" Proizvodno trgovačko preduzeće d.o.o. Laktaši, Trn, Cara Dušana 110, 78250 Laktaši.

1.1. Privredni subjekt Nestro Petrol

Privredni subjekt Akcionarsko društvo za promet nafte, naftnih derivata i prirodnog gasa "Nestro Petrol" Banja Luka, Kralja Alfonsa XIII broj 9, 78000 Banja Luka, registrovan je u Okružnom privrednom sudu Banja Luka (rješenje broj: 071-0-reg-002511 od dana 25. februara 2008. godine) pod matičnim brojem: 1-10073-00 (JIB 4400959260004), s osnovnim kapitalom u iznosu od (..)**¹KM, i sa (..)**% vlasničkih udjela privrednog subjekta Otvoreno akcionarsko društvo "NeftegazInKor", Ul. Kalančevskaja 11. Korpus 2. Moskva, Ruska Federacija (upisan u Jedinstveni državni registar pravnih lica u Moskvi, dana 2. avgusta 1999. godine pod brojem: 1027708003256) i (..)**% vlasničkih udjela ostalih dioničara.

Pretežne registrovane djelatnosti privrednog subjekta Nestro Petrol su trgovina na malo motornim gorivima i mazivima (šifra djelatnosti 50.500) i distribucija i prodaja plinskih goriva distributivnom mrežom (šifra djelatnosti 40.220).

Privredni subjekt Nestro Petrol ima 88 benzinskih stanica (u vlasništvu ili zakupu) na tržištu prodaje na malo naftnih derivata u Bosni i Hercegovini.

1.2. Privredni subjekt Parma Trend

Privredni subjekt "Parma Trend" Proizvodno trgovačko preduzeće d.o.o. Laktaši, Trn, Cara Dušana 110, 78250 Laktaši, registrovan je u Osnovnom sudu u Banja Luci pod brojem: 1-12480-00 dana 27. marta 2002. godine, s osnovnim kapitalom od (..)**KM, i sa (..)**% vlasničkih udjela u kapitalu fizičkog lica Kelečević David (Mrčevci bb, Mrčevci – lična karta (..)**).

Pretežne registrovane djelatnosti privrednog subjekta Parma Trend su trgovina na malo motornim gorivima (šifra djelatnosti 50.500).

Privredni subjekt Parma Trend ima 23 benzinske stanice (u vlasništvu i zakupu) na tržištu trgovine na malo naftnih derivata u Republici Srpskoj.

¹ (..)** - Podaci predstavljaju poslovnu tajnu, u smislu člana 38. Zakona o konkurenciji

2. Pravni okvir ocjene koncentracije

Konkurencijsko vijeće u postupku ocjene koncentracije primijenilo je odredbe Zakona, Odluke o utvrđivanju relevantnog tržišta («Službeni glasnik BiH», br. 18/06 i 34/10), te Odluke o načinu podnošenja prijave i kriterija za ocjenu koncentracija privrednih subjekta.

3. Pravni osnov koncentracije

Kao pravni osnov koncentracije je dostavljeno Pismo namjere zaključeno između privrednog subjekta Nestro Petrol (Aleksandr Diakonov, direktor) i privrednog subjekta Parma trend (Milutin Žujić, direktor), dana 30. maja 2011. godine, kojim se potvrđuje spremnost da će se namjeravana koncentracija izvršiti.

Ovim Pismom namjere privredni subjekt Nestro Petrol izražava namjeru da će od privrednog subjekta Parma Trend kupiti benzinsku stanicu, koja se nalazi u Laktašima (na magistralnom putu Banja Luka – Gradiška), a privredni subjekt Parma Trend potvrđuje da će istu prodati privrednom subjektu Nestro Petrol.

4. Relevantno tržište predmetne koncentracije

Relevantno tržište koncentracije, u smislu člana 3. Zakona, te čl. 4. i 5. Odluke o utvrđivanju relevantnog tržišta, čini tržište određenih proizvoda /usluga koje su predmet obavljanja djelatnosti na određenom geografskom tržištu.

Prema odredbi člana 4. Odluke o utvrđivanju relevantnog tržišta u proizvodnom smislu obuhvaća sve proizvode i/ili usluge koje potrošači i/ili korisnici smatraju međusobno zamjenjivim, pod prihvatljivim uslovima, imajući u vidu posebno njihove bitne karakteristike, kvalitet, uobičajenu namjenu, način upotrebe, uslove prodaje i cijene.

Nadalje, prema članu 5. Odluke o utvrđivanju relevantnog tržišta, relevantno tržište u geografskom smislu obuhvaća cjelokupan ili dio teritorije Bosne i Hercegovine na kojoj privredni subjekt djeluje u prodaji i/ili kupovini relevantnog proizvoda pod jednakim ili dovoljno ujednačenim uslovima i koji to tržište bitno razlikuje od uslova tržišne konkurencije na susjednim geografskim tržištima.

Na osnovu podataka iz Prijave relevantno tržište proizvoda i/ili usluga u konkretnom slučaju je tržište prodaje naftnih derivata na malo.

Budući da privredni subjekt Parma Trend isključivo djeluje na tržištu Republike Srpske, relevantno tržište u geografskom smislu smatra se Republika Srpska.

Slijedom navedenoga, pod relevantnim tržištem predmetne koncentracije smatra se tržište prodaje naftnih derivata na malo u Republici Srpskoj.

4.1. Analiza relevantnog tržišta

Broj benzinskih stanica učesnika koncentracije u Bosni u Hercegovini, Republici Srpskoj, Federaciji Bosne i Hercegovine i Brčko distriktu Bosne i Hercegovine:

Tabela 1.

R.b.	Naziv privrednog subjekta	Republika Srpska	Federacija BiH	Brčko distrikt BiH	Ukupno Bosna i Hercegovina
1.	Nestro Petrol	78	8	2	88
2.	Parma Trend	23	-	-	23
3.	Ostali	288	642	67	997
	UKUPNO	389	650	69	1108

Izvor: podaci iz Prijave

Broj benzinskih stanica učesnika koncentracije i tržišni udjeli na relevantnom tržištu Republike Srpske, prije provođenja koncentracije:

Tabela 2.

R.b.	Naziv privrednog subjekta	Broj benzinskih stanica u RS	Udio u %
1.	Nestro Petrol	78	20,05
2.	Parma Trend	23	5,91
3.	Ostali	288	74,04
	UKUPNO	389	100,00

Izvod: podaci iz Prijave

Nakon provedene koncentracije (kupovine jedne benzinske stanice privrednog subjekta Nestro Petrol od privrednog subjekta Parma Trend), tržišni udjeli na relevantnom tržištu su:

Tabela 3.

R.b.	Naziv privrednog subjekta	Republika Srpska	Tržišni udio %
1.	Nestro Petrol	79	20,31
2.	Parma Trend	22	5,66
3.	Ostali	288	74,04
	UKUPNO	389	100,0

Izvod: podaci iz Prijave

5. Obaveza prijave koncentracije

Obaveza prijave koncentracije privrednih subjekta, u smislu člana 14. stav (1) tačka b) Zakona, postoji ako ukupni godišnji prihodi svakog od najmanje dva privredna subjekta učesnika koncentracije ostvarena prodajom roba i /ili usluga na tržištu Bosne i Hercegovine iznose najmanje 8 miliona KM po završnom računu u godini koja je prethodila koncentraciji, ili ako je njihov zajednički udio na relevantnom tržištu veći od 40,0%.

Članom 14. stav (3) Zakona je utvrđeno da u slučaju da se koncentracija odnosi na spajanje ili pripajanje dijela ili dijelova jednog ili više privrednih subjekta, bez obzira da li ti dijelovi imaju status pravnog lica, pri izračunu prihoda, obračunavat će se samo prihod onih dijelova privrednog subjekta koji su predmetom kontrole koncentracije.

Ukupni godišnji prihodi privrednog subjekta Nestro Petrol i privrednog subjekta Parma Trend (kao i njegovog dijela – benzinske stanice Laktaši - predmet koncentracije), na dan 31. decembra 2010. godine:

Tabela 4.

KM	Nestro Petrol	Parma Trend	
		Ukupan prihod	Benzinska stanica Laktaši
Svijet	-	-	-
Bosna i Hercegovina	(..)**	(..)**	(..)**

Izvod: podaci iz Prijave

Prema podacima iz Prijave (Tabela 4.) učesnici koncentracije nisu ispunili uslov ukupnog godišnjeg prihoda, u smislu člana 14. stav (1) tačka b) Zakona, budući da dio privrednog subjekta Parma Trend (benzinska stanica - Laktaši), koji je predmet koncentracije, ima godišnji prihod manji od 8 miliona KM, odnosno ima godišnji prihod od (..)**KM. Također, učesnici koncentracije nisu ispunili ni uslov da je njihov zajednički tržišni udio na relevantnom tržištu veći od 40,0% (Tabele 1., 2. i 3.), jer isti nakon provedene koncentracije imaju oko 20,31%, te na osnovu iznesenoga privredni subjekt Nestro Petrol nije bio obavezan podnijeti prijavu koncentracije.

6. Administrativna taksa

Podnosilac prijave na ovaj Zaključak, u skladu sa članom 2. stav (1) tarifni broj 108. tačka c) Odluke o administrativnim taksama u vezi s procesnim radnjama pred Konkurencijskim vijećem («Službeni glasnik BiH», br. 30/06 i 18/11) je dužan platiti administrativnu taksu u iznosu od 1.000,00 KM, u korist Budžeta institucija Bosne i Hercegovine.

7. Pouka o pravnom lijeku

Protiv ovog Zaključka nije dozvoljena žalba.

Nezadovoljna strana može pokrenuti upravni spor pred Sudom Bosne i Hercegovine u roku od 30 dana od dana prijema, odnosno objave ovog Zaključka.

Predsjednik

dr. Stjepo Pranjić